



Uunga:

Inatsisartunut ilaasortaq Anthon Frederiksen
Kattusseqatigiit Partiiat

Inatsisartunut ilaasortap Anthon Frederiksen-ip, Kattusseqatigiit Partiiat, § 36, imm. 1 malillugu apeqqutaata allakkatigut akineqarnera

11. november 2008

§ 36 malillugu naalakkersuisunut apeqquteqarninni aningaasat naleerukkiartornerannut tamatumunngalu naalakkersuisut qanoq iliorniarnernik apeqqutigarpuit. Naalakkersuisut apequtigisannut makkuninnga akissuteqassapput:

Postboks 1037
3900 Nuuk
Oq/tel +299 34 50 00
Fax +299 32 46 14
oed@gh.gl
www.nanoq.gl

Apeqqut:

Olie-p ikummatissap akiata qaffatsaalinnissaa qulakkeerniarlugu naalakkersuisut qanoq iliuseqalersaarpat

Akissut:

Naalakkersuisut nunarsuarmi niuernerup ineriartornera nunatsinni maani uuliat akisa ineriartornerannut pingaaruteqartoq malinnaavigiuassavaat. Naalakkersuisut KNI A/S suleqatigalugu isumaqatigiissummik akinik qularnaarisumik nutaamik massakkutut ittumik isumaqatigiissusiornissamik eqqarsaateqarput, isumaqatigiissutimmi taamaattup kalaallit atuisui, assersuutigalugu nunanut avannarlernut allanut naleqqiullugu, uuliamik akikinnerujussuarmik pissaqartissimammagit. Isumaqatigiissut taamaattoq sapinngisamik niuerfinni uuliat akikinnerpaaffigisaanni isumaqatigiissutigisariaqarpoq. Sapaatip akunnerini kingullerni aningaasarsiornerup ajornartorsiornerani uuliap akuigaanngitsup akia malunnartumik appariarsimavoq, taamaammallu isumaqatigiissut akinik qularnaarisoq massakkut isumaqatigiissutigineqarsinnaalerpoq atugassarititat sapaatip akunnerini kingullerniit pitsaanerujussuit atorlugit.

Nutaamik akinik qularnaarisumik isumaqatigiissusiortoqassagalarpat akit qaffannissaat pinngitsoorneqarsinnaassaganngilaq, tassami siuliani taaneqareersutut uuliap akia qanoq issanersoq nunarsuarmi niuernerup ineriartorneranut apeqqutaalluinnarmat. Naalakkersuisulli akit appasinnissaat minnerunngitsumillu aalajaatsuunissaat anguniarpat.

Apeqqut:

Aalisartut, piniartut, savaatillit allallu namminersortut, minnerunngitsumillu innuttaasut kikkulluunniit pinngortitap nukinganic, anorip, erngup seqernullu nukinganic atuisinnaanerminnik periarfissaat qanoq atsigisumik ammatinneqarpat ?

Akissut:

2008-mut aningaasanut inatsimmi aammalu 2009-mut aningaasanut inatsisissatut sunnersuummi konto pingaarnemit 75.01.17 Nukissiuutini ataavartuni ilisimatusarnermi ineriartortitsinermilu suliniutit-nit ukiut tamaasa nukissiuutinut ataavartunut ilisimatusarnissamut ineriartortitsinissamullu 1,5 mio. kr.-inik aningaasaliisoqarpoq. Taakkunannga nukissiuutini taaneqartuni suliniutinut nutaanut tapiisoqartarpoq.

Ukioq manna 2008-mut aningaasanut inatsimmi oqaasertaliussamik aamma ilanngussisoqarpoq, tassanilu aningaaserivinnut akiligassarsititsisartunut naalakkersuisut 90%-inik sillimmasiinnaatitaapput imermik nukissiorfeeqqanik savaatilimmiit ataatsimit imaluunniit arlaliullutik ataatsimoorlutik pilersinneqartunut. Naalakkersuisut taamaalillutik oqaasertaliussap taassuma ataani katillugit 10 mio. kr.-nit ataatsimut sillimmasiinissamik piginnaatinneqarput.

Taakku saniatigut naalakkersuisut nukissiuutit ataavartut ineriartortinneqarnerinut pitsaasunik sinaakkuteqartitsinissamik ingerlaavartumik suliniuteqarput. Naalakkersuisut aamma nunani avannarlerni suliniutit alaatsinaappaat, ilaatigullu nunat taakku assartuisarnermi aalisarnermilu nukissiuutit sakkkortusaavigineqarnissaat pillugit december 2008-mi isumasioqatigiittussaapput. Misissueqqissaarnermimi paasi-neqarsimavoq assartuisarneq aalisarnerlu nukissiuutinik atuiffiunerpaasartut.

Apeqqut:

Nioqqtissat akiisa qaffatsaalinnissaa qulakkeerniarlugu naalakkersuisut qanoq iliuuseqalersaarpat ?

Akissut:

2007-imi 2008-milu nioqqtissat akiisa qaffanneri pissutaallutik pisiassat ulluinnarni atortakkat akii malunnartumik qaffariarput. Massakkulli ilimagineqalerpoq aningaasarsiornermi ajornartorsiornerup aammalu akit aningaasarsiornikkullu pissutsit allanngorarnerisa sakkukilliarernerisa kingurissagaa kinguneriumaaraalu, nioqqtissarpassuit akiisa apparnissaat, soorlu uulia akuigaanngitsaq, savimerngit, karrinik tunisassiat neqillu. Tamaattumik naalakkersuisut massakkut ilimagilerpaat pisiassat ulluinnarni atortakkat akitsulaarnissaat, nioqqtissallu ilaasa akikillinissaat allaat ilimagineqarluni.

Apeqqut:

Aningaasat naleerukkiartornerat killilersimaarniarlugu naalakkersuisut qanoq iliuuseqarniarpa ?

Akissut:

Kalaallit Nunaata annikitsumik ammasumillu aningaasaqarnera pissutaalluni Nunatsinni aningaasat naleerukkiartortarnerat nunani tamalaani niuerfinni akit ineriartornerannik annertuumik sunnerneqartarpoq. Taamaattumik nunatsinni aningaasat naleerukkiartortarnerat Naalakkersuisuniit Inatsisartuniillu sunnerneqarpiaratik nunani tamalaani akit ineriartornerannik sunnerneqarnerusartut.

Taamaattorli nassuerutigineqassaaq akitsuutinik qaffaanerit aningaasat naleerukkiartornerannut pissutaaqataammata, aammalu akitsuutit qaffaaffiginissaat Inatsisartut 2007-imi ukiakkut ataatsimiinneranni akuersissutigineqartut aningaasat naleerukkiartornerat 1,8 procentpoint-it missaannik qaffassimammatic. Massakkut aningaasat naleerukkiartornerat taamak qaffasitsiginera pisooqataalluni Naalakkersuisut 2009-mut aningaasanut inatsip suliarinerani pingaartissimavaat akileraarutit akitsuutillu qaffaaffigineqannginnissaat, taamaaliornikkut aningaasat naleerukkiartornerisa sunniuteqarnerulernissaat pinngitsoorneqassammat.

Inussiarnersumik inuulluaqqusillunga

Per Berthelsen